

Incumbensa Rüegg concernent l'examinaziun da las contribuziuns da scolaziun en vista a la mancanza da forzas da lavur

Las organisaziuns da tetg da l'economia fan mintga onn in'enquista. Quella mussa cleramain, ch'en il Grischun mancan particularmain collavuraturas e collavuratur cun in emprendissadi terminà sin il stgalim da la furmaziun professiunala da basa sco er forzas spezialisadas cun autas qualificaziuns e cun qualificaziuns specificas. Per l'attractivitat d'in lieu da lavur e da domicil giogan – ultra da purschidas attractivas da scolaziun e da furmaziun supplementara – er las contribuziuns da scolaziun ina rolla che na dastga betg vegnir sutvalitada. La Lescha actuala davart las contribuziuns da scolaziun (Lescha da stipendis, LStip) è entrada en vigur l'onn 2007. Dapi lura n'è ella strusch pli vegnida adattada. Igl è pia uras d'evaluar l'effect da la Lescha da stipendis e d'examinar eventualas midadas da questa lescha. L'examinaziun da la Lescha da stipendis duai resguardar la mancanza da persunas spezialisadas, che vegn a s'augmentar ils proxims onns pervia dal svilup demografic. En quest connex duai vegnir examinà, co che l'effect da las contribuziuns da scolaziun po vegnir applitgà per mitigiar la mancanza da persunas spezialisadas, quai cun sviluppar vinavant ils instruments existents e cun introducir novs instruments. En spezial duain vegnir extendids ils emprests per scolaziuns e furmaziuns supplementaras orientadas a la professiun. Plinavant ston vegnir examinadas las proceduras existentas e vegnir proponidas simplificaziuns.

Il rapport «Custs directes ed indirects da la furmaziun professiunala da basa per persunas creschidas: inventarisaziun da las pussaivladads e dals deficits da finanziaziun en Svizra», ch'è vegnì elavurà per incumbensa da la Conferenza svizra dals uffizis da la furmaziun professiunala (CSFP) en il rom da l'iniziativa davart la furmaziun professiunala 2030, mussa in basegn d'agir en il chantun Grischun sin il champ da la furmaziun professiunala da basa per persunas creschidas. Igl è inditgà, che – sche pussaivel – tut las persunas sur 40 onns hajan en l'avegnir la pussaivladad da far in diplom da la furmaziun professiunala da basa, independentamain da las relaziuns finanzialas da la persuna correspudenta. Per promover la furmaziun professiunala da basa per persunas creschidas stoi er vegnir examinà, sch'i pon vegnir dads ulteriurs impuls fiscals a favur dals custs da furmaziun indirects. Perquai che las cumpetenzas che vegnan duvradas sin il martgà da lavur sa midan, en spezial pervia da la digitalisaziun e pervia d'automatisaziuns, stoi vegnir examinà, co ch'igl è pussaivel da promover en l'avegnir segundas scolaziuns e furmaziuns supplementaras per persunas creschidas da nov cun contribuziuns da scolaziun.

Sin basa da questas explicaziuns vegn la Regenza incumbensada d'evaluar l'effect da la Lescha davart las contribuziuns da scolaziun (Lescha da stipendis, LStip) e da far las adattaziuns necessarias, principalmain en vista a la mancanza da persunas spezialisadas.

Cuira, ils 12 da zercladur 2024

Rüegg, Koch, Bettinaglio, Adank, Altmann, Bardill, Bavier, Beeli, Berther, Berthod, Berweger, Biert, Binkert, Bischof, Bisculm Jörg, Bleuler-Jenny, Brandenburger-Caderas, Bundi, Candrian, Censi, Collenberg, Crameri, Danuser (Cuira), Das, Della Cà, Dietrich, Dürler, Furger, Gansner, Gort, Gredig, Hartmann, Heim, Heini, Hohl, Holzinger-Loretz, Jochum, Kocher, Kohler, Koppenberg, Kreiliger, Lamprecht, Loepfe, Luzio, Mani, Mazzetta, Menghini-Inauen, Michael (Donat), Michael (Castasegna), Mittner, Morf, Natter, Pfäffli, Rauch, Rettich, Righetti, Rodigari, Rusch Nigg, Rutishauser, Said Bucher, Saratz Cazin, Sax, Schneider, Schutz, Spagnolatti, Stiffler, Stocker, von Ballmoos, von Tschärner, Wieland (Tumein), Wilhelm, Zindel